



INFORME DA SECRETARÍA XERAL TÉCNICA SOBRE O ANTEPROXECTO DE LEI DE RESIDUOS E SOLOS CONTAMINADOS DE GALICIA.

INFORME

1. Obxecto

Constitúe o obxecto da presente norma a aprobación dunha nova Lei de Residuos e Solos Contaminados de Galicia. O anteproxecto ten por obxecto a regulación da produción e xestión sustentable dos residuos, potenciando medidas que preveñan a súa produción e diminúan os impactos adversos sobre a saúde humana e o medio, vinculados á súa xeración e xestión, á vez que se fomenta o uso sustentable dos recursos e a transición cara a unha economía circular no territorio da Comunidade Autónoma de Galicia.

É obxecto, ademais, desta lei regular o réxime xurídico dos solos contaminados.

Esta lei substituirá a actual Lei 10/2008, do 3 de novembro, de residuos de Galicia. Quedan derogadas todas as normas de igual ou inferior rango que contradigan ou se opoñan ao disposto nesta lei e, en concreto:

- a) Lei 10/2008, do 3 de novembro, de residuos de Galicia
- b) Decreto 59/2009, do 26 de febreiro, de rastrexabilidade de residuos.
- c) Decreto 154/1998, do 28 de maio, polo que se publica o catálogo de residuos de Galicia.

2. Marco normativo e competencial

No ámbito comunitario o marco xurídico ven establecido polo disposto na Directiva 2008/98/CE do Parlamento Europeo e do Consello, do 19 de novembro de 2008, sobre os residuos e pola que se derrogan determinadas Directivas (denominada en diante “Directiva marco de residuos”).

A nivel estatal a transposición da directiva fíxose a través da Lei 22/2011, do 28 de xullo, de residuos e solos contaminados. Esta lei ten carácter de lexislación básica, de acordo co artigo 149.1.23ª da Constitución Española atribúe ao Estado, sen prexuízo



das facultades das Comunidades Autónomas de establecer normas adicionais de protección.

A nivel autonómico a Comunidade autónoma ten competencia exclusiva para aprobar as normas adicionais sobre protección do ambiente de acordo co disposto no artigo 27.30 do Estatuto de autonomía. O Decreto 106/2018, do 4 de outubro, que modifica o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia e o Decreto 196/2012, do 27 de setembro, polo que se crea a Axencia de Turismo de Galicia e se aproban os seus estatutos, dispón que a Consellería do Medio Ambiente, Territorio e Vivenda é o órgano da Administración da Comunidade Autónoma á que lle corresponden as competencias e funcións en materia de ambiente, ordenación do territorio e urbanismo, e conservación da natureza, conforme o establecido no Estatuto de autonomía para Galicia nos termos sinalados na Constitución española.

Polo demais, e no que se refire á competencia para a aprobación do proxecto de lei sobre o que versa o presente informe, a mesma correspóndelle ao Consello da Xunta, de conformidade co artigo 4.6 da Lei 1/1983, do 22 de febreiro, de normas reguladoras da Xunta e da súa presidencia, de acordo co disposto no artigo 34.5 da antedita lei 1/1983 e tendo en conta o disposto no artigo 1 do Decreto 42/2019, do 28 de marzo, polo que se establece a estrutura orgánica da Consellería de Medio Ambiente, Territorio e Vivenda.

3. Estrutura do proxecto normativo

O anteproxecto de lei consta de 92 artigos, distribuídos en nove títulos, tres disposicións adicionais, catro disposicións transitorias, unha disposición derogatoria e dúas disposicións derradeiras.



4. Tramitación

Polo que respecta á instrución na elaboración do proxecto normativo, esta acomodouse aos preceptos que lle sexan de aplicación das seguintes normas:

- Trámite de consulta pública previa previsto no artigo 133 da Lei 39/2015, o que constitúe unha maior garantía de participación cidadá, aínda que non constituía un trámite preceptivo.
- Acordo de inicio (artigo 6.1 do Regulamento de réxime interior da Xunta de Galicia).
- A aprobación inicial do anteproxecto como anteproxecto de Lei pola persoa titular da Consellería de Medio Ambiente Territorio e Vivenda tivo lugar en data 05 de maio de 2019.
- Memoria xustificativa sobre a legalidade, acerto e oportunidade (artigo 6.1 do Regulamento de réxime interior da Xunta de Galicia) e sobre a adecuación da iniciativa aos principios previstos no artigo 37.a) da Lei 14/2013, do 26 de decembro, de racionalización do sector público autonómico, a teor do cal: “En todas as iniciativas normativas xustificárase a súa adecuación aos principios de necesidade, proporcionalidade, seguridade xurídica, transparencia, accesibilidade, simplicidade e eficacia.”
- Memoria económico financeira (artigo 12 da Lei 15/2010, do 28 de decembro, de medidas fiscais e administrativas), axustada ao modelo previsto na Orde do 3 de marzo de 2011 pola que se establece o contido mínimo da memoria económico financeira nos casos de iniciativas legislativas ou de aprobación de normas con rango regulamentario, plans ou programas de actuación.
- Táboa de vixencias de disposicións anteriores sobre a mesma materia, con consignación expresa das que han de quedar total ou parcialmente derogadas (artigo 6.3 do Regulamento de réxime interior da Xunta de Galicia).



- Publicidade nos termos previstos no artigo 9 da Lei 1/2016, do 18 de xaneiro, de transparencia e bo goberno. Publicouse no Portal de Transparencia e Goberno Aberto, constando certificado de publicación no dito portal de data 20 de febreiro de 2017.
- Trámite de participación previsto no artigo 16 da Lei 27/2006, do 18 de xullo, por la que se regulan los derechos de acceso a la información, de participación pública y de acceso a la justicia en materia de medio ambiente (incorpora las Directivas 2003/4/CE y 2003/35/CE). O proxecto foi sometido a información pública de acordo cos artigos 16 a 18 da Lei 27/2006, do 18 de xullo, pola que se regulan os dereitos de acceso á información, de participación pública e de acceso á xustiza en materia de ambiente. O anuncio publicouse no Diario Oficial de Galicia o 8 de maio do 2019.
- Informe da dirección xeral competente en materia de orzamentos (artigo 12 da Lei 15/2010, do 28 de decembro). O informe de sostibilidade financeira da Dirección Xeral de Planificación e Orzamentos foi emitido con data de 17 de xuño de 2019.
- Informe sobre impacto de xénero (artigo 7 do Texto refundido das disposicións legais da Comunidade Autónoma de Galicia en materia de igualdade, aprobado polo Decreto legislativo 2/2015, do 12 de febreiro). O informe de impacto de xénero da Secretaría Xeral de Igualdade foi emitido o 5 de xuño de 2019.
- Ditame preceptivo do Consello Económico e Social, conforme ao artigo 5.1.1 a) da Lei 6/1995, do 28 de xuño, pola que se crea o Consello Económico e Social de Galicia.
- Informe da Asesoría Xurídica Xeral (artigo 8 do Regulamento de réxime interior da Xunta de Galicia e artigo 8.a) da Lei 4/2016, do 4 de abril, de ordenación da asistencia xurídica da Administración xeral da Comunidade Autónoma de Galicia e do seu sector público). Na fase final da tramitación, o expediente



remítiuse ao preceptivo informe da Asesoría Xurídica da Xunta de Galicia, emitíndose o informe en data 10 de decembro de 2019.

- Sometemento á Comisión de Secretarios, previa remisión do texto ás consellerías (artigo 8.1 do Regulamento de réxime interior da Xunta de Galicia), o día 9 de decembro de 2019.
- Elevación ao Consello da Xunta pola persoa titular da consellería (artigos 34.5 da Lei 1/1983, do 22 de febreiro, e 5.1 do Regulamento de réxime interior da Xunta de Galicia).

De conformidade co exposto, esta Secretaría Xeral Técnica informa favorablemente o anteproxecto de Lei de Residuos e solos contaminados de Galicia.

Santiago de Compostela, 11 de decembro de 2019

A secretaria xeral técnica

Carmen Bouso Montero



